



# FRONT PATRIOTIQUE RWANDAIS - INKOTANYI

## IMYANZURO Y'INAMA YA KOMITE NYOBOZI Y'UMURYANGO FPR-INKOTANYI YAGUYE YATERANYE KU ITARIKI 30 MATA NA TARIKI 1 GICURASI 2021 .

---

Ku wa Gatanu, tariki ya 30 Mata 2021 no ku wa Gatandatu tariki 1 Gicurasi 2021, ku cyicaro gikuru cy'Umuryango FPR-INKOTANYI kiri i Rusororo mu Karere ka Gasabo, Umujyi wa Kigali hateraniye inama ya Komite Nyobozi y'Umuryango FPR-INKOTANYI yaguye iyobowe na Nyakubahwa KAGAME Paul, Perezida wa Repubulika y'u Rwanda akaba na Chairman w'Umuryango FPR-INKOTANYI.

Kuri gahunda y'inama hari ingingo zikurikira:

1. Ijambo rya Nyakubahwa Perezida wa Repubulika y'u Rwanda akaba na Chairman w'Umuryango FPR-INKOTANYI ritangiza inama.
  2. Ibiganiro
- **Aho tugeze dushyira mu bikorwa Manifesto y'Umuryango FPR-INKOTANYI 2017-2024/Mid-term review of RPF Manifesto (2017-2024)**
  - **Ishusho y'aho u Rwanda ruhagaze mu guhangana n'icyorezo cya Covid-19/ Covid -19 : Current status and future opportunities**
  - **Ingamba zo kuzahura ubukungu n'ishoramari by'Igihugu byazahajwe na Covid-19/ Reimanaging business and Trade and Industry**



- **Rapor y'u Rwanda ku ruhare rwa Leta y'Ubufaransa muri Jenoside yakorewe Abatutsi / The Muse Investigation Report**
- **Kwibuka twiyubaka**

Mu ijambo rye atangiza inama, Nyakubahwa Perezida wa Repubulika akaba na Chairman w'Umuryango FPR-INKOTANYI yatangiye abwira abayirimo ko inama igamije gusuzuma inshingano zacu nk'abanyamuryango, kureba aho tuvuye n'aho tugana no gusuzuma ibibazo bikitwugarije n'uburyo byakemuka kugira ngo turusheho gutera imbere.

Yashimiye abitabiriye inama anashimira muri rusange Abanyarwanda uburyo bitwaye muri ibi bihe bikomeye duhanganye n'icyorezo cya Covid-19 anagaya abatubahiriza amabwiriza atangwa mu kukirwanya asaba gukomeza kugira imyitwarire myiza, imikorere myiza no gufatanya kugira ngo iki cyorezo tugitsinde.

Nyakubahwa Perezida wa Repubulika akaba na Chairman w'Umuryango FPR-INKOTANYI, yavuze ko Abanyarwanda bakwiye kugira imikorere idasanwe n'uburyo budasanzwe kuko n'ibibazo duhanganye nabyo bidasanzwe, yibutsa ko kugira ngo bishoboke bisaba kumenya abo turibo nk'abanyarwanda, ibyo dushaka kugeraho n'uburyo twabigeraho ndetse tukarushaho gukoresha bike dufite tukagera kuri byinshi kandi abakiri bato bakabigiramo uruhare.

Nyuma yo kungurana ibitekerezo ku biganiro byatanzwe, abari mu nama ya Komite Nyobozi y'Umuryango FPR-INKOTANYI yaguye bafashe imyanzuro ikurikira:

1. Abanyamuryango bashimye aho tugeze mu gushyira mu bikorwa Manifesto y'Umuryango FPR-INKOTANYI 2017-2024, biyemeza gukora ku buryo budasanzwe, dukoresha bike dufite tukagera kuri byinshi kugira ngo ibikiri inyuma byitabweho by'umwihariko, bishyirwe muri gahunda y'ibikorwa buri mwaka ku nzego zose kandi ibimaze kugerwaho nabyo bigakomeza kwitabwaho kugirango birambe.



2. Kongera imbaraga mu guhangana n'icyorezo cya Covid-19 Abanyarwanda barushaho kongera imbaraga mu mikorere no kugira imyitwarirere myiza kugirango tugitsinde burundi, abayobozi bakaba intangularugero.
  
3. Kurushaho kongera umusaruro w'ibikorerwa mu nganda zo mu Rwanda mu bwiza no mu bwinshi, kugira ngo twongere ibyo twohereza hanze kandi hagashyirwaho uburyo bwose butuma ibikorerwa mu nganda zo mu Rwanda bishobora guhangana n'ibindi bicuruzwa biri ku isoko ryo mu Rwanda kimwe no ku isoko mpuzamahanga.
  
4. Kongerera ubushobozi urwego rw'ubuvuzi hashyirwa imbaraga mu kongera ibikorwa remezo, ubumenyi bw'abavuzi kugira ngo tugabanye umubare w'abanyarwanda bajya kwivuriza hanze no kongera umubare w'abaforomo kuko utajyanye n'ubwiyongere bw'abaturage.
  
5. Kunoza uburyo bwo kwihutisha gutanga inguzanyo, ubwo kubona ingwate kuri ba rwiyemezamirimo mu rwego rwo kwihutisha ishoramari.
  
6. Abitabirye inama bashimye raporo yakozwe ku ruhare rwa Leta y'Ubufaransa muri Jenoside yakorewe Abatutsi mu Rwanda, biyemeza kuyigira iyabo kandi bagashishikariza n'Abanyarwanda bose kuyigira iyabo.
  
7. Gukomeza kwibuka Jenoside yakorewe Abatutsi mu w'1994, twiyubaka ariko duhangana n'uwo ariwe wese uyipfobya, akayihakana mu buryo ubwo ari bwo bwose twese tubigizemo uruhare.
  
8. Abari mu nama basabye urubyiruko kwihatira kumenya amateka nyakuri y'Igihugu cyacu, bakagikunda bakanahangana n'icyo aricyo cyose cyabangamira ubumwe by'Abanyarwanda.

Bikorewe i Rusororo, ku wa 01 Gicurasi 2021.

